

干政與清匪

顏旨微

吾人對於有特殊勢力之現役軍人。甚希望於知識海中。能畫出最清晰之界線。即何者爲其應管之事。何者爲其不應管之事。吳佩孚在直皖、直奉、兩役而後。聲譽之隆。莫可比擬。今則以遙制政柄。因王闕傾敗。而論者遂以吳氏政治之手腕之拙劣。認爲失敗。吾人之見略異於是。蓋以武人而干預政治。手腕拙劣。固得謂爲失敗。即手腕不拙劣。寧得謂爲成功。祇以其不應管而管。在根本即已破壞國家法制。自始即爲失敗矣。

故在今日。吳氏之應管者。即爲清匪問題。豫省之匪。因妨及外人之財產生命。已起外交上重大之交涉。魯省之匪。且將妨及外人之財產生命。亦必起外交上重大之糾葛。兩省之地。皆吳氏所直轄。實言之。魯、豫、兩省之人民及旅居魯、豫、外人之受困於匪。實吳氏之責任也。前數日間。英、法、美、各駐使。以豫匪之擄掠教士商人。地方官吏。已失其保護外僑之能力。遂有派員赴豫調查。並通牒外部。謂豫省官吏如無法維持其職責。外交團將執適宜之救濟方法。察其辭意。似將藉此而致其干涉之旨。及見吳氏來電表明負責。於是命調查委員暫緩出發。吾人從可知者。一國在國際間而受干涉。因爲不名譽之事。而藉故以強力干涉他人。在國際法上。亦不認爲名譽之事。外交團之欲派員赴豫。及嚴重通牒。皆爲不得已之舉。長此以往。吾恐必將更藉正義之名。而爲實際的之干涉矣。

吾人曾見吳氏來電。略謂豫省土匪。危及外國僑民之生命。延至今日。尙未能恢復秩序。被擄外人。亦未能救出。此不能不對英、法、美、等國僑民深表歉意。現已任命陸軍第十四師長靳雲鶚爲勦匪總司令。並使負援救外人之責。委員團之行程。似可從緩云云。吾人以此電。除道歉及卸責與靳雲鶚外。所舉辦法。亦不能認爲切實。而外圍方面。何以即執此以視吾政府是否有維持豫局之誠意與能力。京、滬、各英文報。均謂豫省匪患。中央政府固不能辭其責。而吳佩孚亦不能辭其責。蓋以大軍屯在之地。盜匪披猖日甚。國家養兵將何用。今擁兵者不治匪。即等於養匪。國家人民從而所受之損害。實擁兵者之責任甚於盜匪也。故吾人特以應管不應管之義。忠告吳氏。希望吳氏於此數年之間。用其精力以治直、魯、豫、等省之匪。不必涉慮於政治之事。自無須更聚兵歛械以爲內爭。且保持其國內外已往之榮譽。使不墜落。冷眼靜觀政治上一般過渡之人材。逐漸失敗過去。然後由純正的軌道。建築其政治上之生命。決不爲晚。設或不然。徒以重權積勢。以攘奪不應奪之政權。將責任內應管之事反置不管。外人謗謫。國人怨憤。在吾人觀之。固自始即爲失敗。即就其本身之結束言。亦至終不能免於失敗而已。